

韓清淨 科記

彌勒講堂 印行

瑜伽師地論科句披尋記 三

B94
201010
3

瑜伽師地論科句披尋記卷第二十一

彌勒菩薩說

唐三藏沙門玄奘奉詔譯

韓清淨科記

本地分中聲聞地第十三初瑜伽處種性地品第一

丙十、聲聞地³ 丁一、結前生後

如是已說修所成地。云何聲聞地？

丁二、正廣分別² 戊一、總標一切

一切聲聞地總嚙陀南曰：

若略說此地 性等數取趣 如應而安立 世間出世間

此地略有三 謂種性趣入 及出離想地 是說為聲聞

戊二、別辨一一³ 己一、種性地³ 庚一、徵

云何種性地？

瑜伽師地論科句披尋記卷第二十一



庚二、標² 辛一、喩柁南

喩柁南曰：

若略說一切 種性地應知 謂自性安立 諸相數取趣

辛二、長行

謂若種性自性、若種性安立、若住種性者所有諸相、若住種性補特伽羅，如是一切總略為一，名種性地。

庚三、釋⁴ 辛一、自性³ 壬一、徵

云何種性？

壬二、釋² 癸一、辨相

謂住種性補特伽羅，有種子法。由現有故，安住種性補特伽羅，若遇勝緣，便有堪任、便有勢力，於其涅槃能得能證。

謂住種性補特伽羅有種子法者：意地中說：此一切種子識，若般涅槃法者，一切種子皆悉具足；不般涅槃法者，便闕三種菩提種子。（陵本二

卷一頁¹⁰¹）由此當知，此種子法，謂聲聞菩提種子；由附所依有此種子法故，名住聲聞種性補特伽羅。未遇生緣，安住自性無有變異，亦無失壞，故名為住。

癸二、問答² 子一、異名

問：此種性名有何差別？答：或名種子，或名為界，或名為性，是名差別。

子二、體性

問：今此種性以何為體？答：附在所依，有如是相，六處所攝。從無始世展轉傳來，法爾所得。於此立有差別之名，所謂種性、種子、界、性。

壬三、結

是名種性。

附在所依等者：此中所依，謂有識身。攝大乘論說：出世心從最清淨法界等流正聞熏習種子所生。此聞熏習，隨在一種所依轉處，寄在異熟識中，與彼和合俱轉，猶如水乳。（攝論一卷十四頁）如是應知，附所依義。又

如下說：住種性者所有諸相，謂與一切無涅槃法補特伽羅諸相相違，當知即名安住種性補特伽羅所有諸相。今指彼相違相，說有如是相言。又如下說：如是種子，非於六處有別異相，即於如是種類、分位、六處殊勝，是故此說六處所攝。又此種性，非無般涅槃法補特伽羅熏習可有。若許爾者，應不建立有無種性二種差別。然實不爾。即由是義，說住種性補特伽羅有種子性，從無始世展轉傳來，法爾所得。

辛二、安立² 壬一、釋² 癸一、正辨相² 子一、辨麤細² 丑一、問

云何種性安立？謂應問言：今此種性，為當言細？為當言麤？

丑二、答³ 寅一、標

應答言：細。

寅二、徵

何以故？

寅三、釋

由此種子未能與果、未習成果，故名為細。若已與果、已習成果，爾時種性若種、若果，俱說名麤。

由此種子未能與果等者：菩薩地說：種性有二。一、本性住種性，二、習所成種性。今約最初，名未能與果；約彼第二，名未習成果。即於此位，由未有果，此種子相難可現見，故名為細。與此相違，由與果俱，是故種、果俱說名麤。

子二、辨一多² 丑一、問

問：如是種性，當言墮一相續？墮多相續？

墮一相續墮多相續者：相續有四。一、自身相續，二、他身相續，三、諸根相續，四、境界相續。如攝事分說。（陵本一百卷十五頁⁷⁵¹⁰）今此義中，唯約諸根相續為論。由前已說六處所攝，故作是問：如是種性，墮一？墮多？

丑二、答³ 寅一、標

答：當言墮一相續。

當言墮一相續者：此中義顯，唯墮意處，故言墮一相續。攝大乘說：寄在異熟識中。彼異熟識，意處攝故。

寅二、徵

所以者何？

寅三、釋² 卯一、反顯

若法異相，俱有而轉；見彼各別種種相續、種種流轉。

卯二、正成

如是種子，非於六處有別異相。

若法異相俱有而轉等者：如說：眼等六識是識自性差別；又說：眼等六觸、六受、六想、六思，是名觸、受、想、思自性差別。如是等類，雖依眼等六處而生，然非是一，名法異相。能依所依，同生住滅，是名俱有而轉。由是見彼六處，各別為依，及彼諸法差別生起，是名見彼各別種種相

續，種種流轉。若如是者，彼六處攝心心所法，應可說言墮多相續；種子不爾，非於六處有別異相，非彼六處俱有而轉，不見各別種種相續為依，及彼差別種種流轉，故不應言，墮多相續。

即於如是種類、分位、六處殊勝，從無始世展轉傳來，法爾所得，有如是想及以言說，謂為種性、種子、界、性，是故當言墮一相續。

即於如是種類分位六處殊勝等者：有涅槃法補特伽羅，是名種類。安住種性位中，是名分位。彼所有相，與一切無涅槃法補特伽羅諸相相違，是名六處殊勝。依如是義，假想安立諸差別名，謂為種性、種子、界、性。非析諸行別有實物名為種子，亦非餘處；然即諸行如是種性，如是等生，如是安布，名為種子。如決擇分說。（陵本五十二卷十五頁⁴¹⁹⁸）由是當知，種子非於六處有別異相，是故當言墮一相續。

癸二、廣眾緣² 子一、違緣² 丑一、問

問：若住種性補特伽羅有涅槃法，此住種性有涅槃法補特伽羅，何因緣故有

涅槃法，而前際來長時流轉，不般涅槃？

丑二、答⁵ 寅一、標

答：四因緣故，不般涅槃。

寅二、徵

何等為四？

寅三、列

一、生無暇故；二、放逸過故；三、邪解行故；四、有障過故。

寅四、釋⁴ 卯一、生無暇³ 辰一、徵

云何生無暇？

辰二、釋

謂如有一，生於邊國及以達須、蔑戾車中，四眾、賢良、正至、善士不往遊涉。

辰三、結

是名生無暇。

四眾賢良正至善士不往遊涉者：謂苾芻、苾芻尼、近事男、近事女，是名四眾。一切賢聖，是名賢良。已趣各別煩惱寂靜，是名正至。百行所攝，受諸律儀，是名善士。

卯二、放逸過³ 辰一、徵

云何放逸過？

辰二、釋

謂如有一，雖生中國，又非達須、非蔑戾車，四眾、賢良、正至、善士皆往遊涉；而生貴家，財寶具足，於諸妙欲耽著受用，不見過患，不知出離。

辰三、結

是名放逸過。

卯三、邪解行³ 辰一、徵

云何邪解行？

辰二、釋² 巳一、出惡見² 午一、標

謂如有一，雖生中國，乃至廣說；而有外道種種惡見。

午二、釋

謂起如是見，立如是論：無有施與，廣說乃至我自了知無諸後有。

無有施與等者：撥無施與、愛養、祠祀；撥無妙行、惡行，及彼二業果及異熟。如有尋有伺地說。（陵本八卷十四頁⁶¹²）此中廣說乃至無諸後有，隨應當知。

巳二、明過患

復由如是外道見故，不值諸佛出現世間，無諸善友說正法者。

辰三、結

是名邪解行。

無諸善友說正法者者：具八因緣，名善友性。宣說初時所作無倒言論，及與超勝四種聖諦相應言論，是名善說正法。如下自說，別釋其相應知。

(陵本二十五卷一頁
2069)

卯四、有障過³ 辰一、徵

云何有障過？

辰二、釋³ 巳一、異熟障

謂如有一，雖生中國，廣說如前，亦值諸佛出現於世，遇諸善友說正法者；而性愚鈍，頑駭無知，又復瘡痍，以手代言，無力能了善說、惡說所有法義。

巳二、業障

或復造作諸無間業。

巳三、煩惱障

或復長時起諸煩惱。

辰三、結

是名有障過。

云何有障過等者：此說重障，略有三種。謂異熟障、業障、煩惱障。異熟障者，謂若生處，聖道依彼不生不長，於是生處異熟果生；或有生處，聖道依彼雖得生長，而於其中異熟果生，聾駘愚鈍，盲瞽瘡癰，以手代言，無有力能解了善說、惡說法義；是名異熟障。言業障者，謂五無間業，及餘所有故思造業諸尤重業。彼異熟果若成熟時，能障正道，令不生起，是名業障。煩惱障者，謂猛利煩惱、長時煩惱。由此煩惱，於現法中，以其種種淨行所緣不能令淨，是名煩惱障。如下自說。（陵本二十九卷十五頁²⁴⁵³）此說有障，其義應知。

寅五、結² 卯一、正顯有種性² 辰一、不般涅槃

如是名為四種因緣。由此因緣故，雖有般涅槃法，而不般涅槃。

辰二、得般涅槃

彼若值遇諸佛出世，聽聞正法，獲得隨順教授教誡，無彼因緣，爾時方能善根成熟，漸次乃至得般涅槃。

卯二、兼明無種性

無涅槃法補特伽羅，住決定聚。彼若遇緣、若不遇緣，遍一切種，畢竟不能得般涅槃。

無涅槃法補特伽羅住決定聚等者：住無種性補特伽羅，乃至盡未來際，生死流轉無有止息，是名住決定聚。由此義故，彼若值遇諸佛出世，聽聞正法，獲得隨順教授教誡為增上緣；若不值遇；遍於一切界趣生中，彼彼有情畢竟不能得般涅槃。

子二、順緣² 丑一、問

問：何等名為涅槃法緣，而言闕故、無故、不會遇故，不般涅槃？

丑二、答⁴ 寅一、標

答：有二種緣。

寅二、徵

何等為二？

寅三、列

一、勝，二、劣。

寅四、釋² 卯一、辨二相² 辰一、勝緣² 巳一、徵

云何勝緣？

巳二、列

謂正法增上他音，及內如理作意。

謂正法增上他音等者：聞他宣說超勝四聖諦法言音，是名正法增上他音。

由此為依，發生自內如理所引作意，名內如理作意。

辰二、劣緣⁴ 巳一、徵

云何劣緣？

巳二、標

謂此劣緣乃有多種。

巳三、列

謂若自圓滿、若他圓滿、若善法欲、若正出家、若戒律儀、若根律儀、若於食知量、若初夜後夜常勤修習恬寤瑜伽、若正知而住、若樂遠離、若清淨諸蓋、若依三摩地。

已四、釋¹² 午一、自圓滿⁴ 未一、徵

云何自圓滿？

未二、列

謂善得人身，生於聖處，諸根無闕，勝處淨信，離諸業障。

未三、釋⁵ 申一、善得人身³ 酉一、徵

云何名為善得人身？

酉二、釋

謂如有一，生人同分，得丈夫身，男根成就，或得女身。

酉三、結

如是名為善得人身。

申二、生於聖處³ 酉一、徵

云何名為生於聖處？

酉二、釋

謂如有一，生於中國，廣說如前，乃至善士皆往遊涉。

酉三、結

如是名為生於聖處。

申三、諸根無闕³ 酉一、徵

云何名為諸根無闕？

酉二、釋

謂如有一，性不愚鈍，亦不頑駘，又不瘡瘕，乃至廣說支節無減。彼由如是支節無闕、耳無闕等，能於善品精勤修集。

酉三、結

如是名為諸根無闕。